



# مہلب تئو چے گؤشئے

مہلب نسیر

# مہلب تئو چے گوشے

مہلب نسیر

ساہیتیا، اسٹکھلم، و

بلوچی لئینگوئیج پرنٹوجکٹ، اوپسالا یونیورسیٹی، سوڈن



مهلب نسیر



UPPSALA  
UNIVERSITET

*Sahitya*

# مہلب تئو چے گوشے

مہلب نسیر

ساہیتیا، اسٹکھلم، و

بلوچی لئینگوئیج پرنٹوچکٹ، اوپسالا یونیورسیٹی، سویڈن

کتابتے نام: مهلب تئو چے کوشے

شائے: مهلب نسير

اٹولی چاپ: 2019

چاپ و شنگ: ساهيتيا، اسٹکھلم، و

بلوچى لئینگوئيچ پرتوچکٹ، اوپسالا يونيورسيٹی،

سويڈن

Copyright © 2019 Mehlab Nasir

اے کتابتے سجهين هک نيشته کارئيگ أنت و کس بے جُستا اے کتاب يا اشيتے بهرے چاپ و شنگ کرت نکنت. البت اگن پکار بوت ته نيشته کار کتابتے کجام هم بهرے وتى نيشتانکانى تھا هتوار کرت کننت، بله گون اے کتابتے سرجمين سرشونا.


ISBN: 978-91-984736-3-6

مہلب، تئو چے گُوشے وتی نیمونے بابتا  
جنگل تئو داشتگانے کہ ترا بال دوست بیت

مہلب نسیر



## نامدات



منی ابا،

تعیی نرین چمانی پُشتا پیټکگین و دارئے ناما.

تعیی دستانی هما سمارئے ناما که تعیی گُمانا اے کتابی مرتگ.

تعیی لُثانی هما واهگئے ناما که اے شعیری وانگ لُوتگانت

و

تعیی جندئے ناما.





## لَظ

- 11 ..... پَچار
- 13 ..... بَیغُو اَہِیَن گُو اَنک
- 15 ..... ہِیَنار
- 17 ..... ہَئور شَپ کَپتگان
- 19 ..... کَدھے پُرشَتگان
- 22 ..... نَزائے ہِچ آسری؟
- 23 ..... پاہار
- 25 ..... سَوَزمان
- 28 ..... سَپَر دَرَد
- 30 ..... ہَسَتی
- 31 ..... ہَؤرک
- 32 ..... بَؤشَت
- 34 ..... چَو مَکن
- 35 ..... *Pendulum*
- 36 ..... مِہر تَرَمپ
- 38 ..... پَر رِچان آن
- 40 ..... زَرِیام

43	.....	گِردام
44	.....	زندِ رنگ
46	.....	وتارا بر گون
49	.....	بلہ اے زِجلانِ بلیت
52	.....	نِدارگانی نون چَم نرُ آنت
54	.....	ناجائز
57	.....	گویاک
59	.....	مؤکو
62	.....	گُبارِستان
66	.....	آپرنگ
68	.....	لولی
72	.....	کئے نون تئی رنگا بجننت
74	.....	بستگینِ در
76	.....	اگان
78	.....	دُرنگئے سِپَر
79	.....	شَریشئے ساہگئے بر
83	.....	پُہل
84	.....	<i>A walk</i>

86	.....	وتكشى
87	.....	سريد آن
88	.....	وتا مروچى راه بدئى
91	.....	رؤهيل
93	.....	ودارمئيت
96	.....	كئى ائى؟
100	.....	شئير
101	.....	گورتهار
103	.....	<i>A Touch, A Click</i>
108	.....	گوشى اى اشك زيكين انت
111	.....	هدائى ميتگ
114	.....	دؤهين كسه ترا گون انت
117	.....	الى جان
120	.....	دلئى دروازگ
121	.....	وتا چه در من ترا شهازان
123	.....	زندام
125	.....	وتى بينگوهايانى گواهنئى پنگا گار آن
127	.....	گدى جون

129 ..... دُرہین سہدار مرگے تاما چشنت، دردارا کئے سرید بکنت

132 ..... "مہلب ہلا سین کتھے"

## پَجَار

مہلب نسیرئے اسلی نام زَرَجَانِ اِنْت و پتئے نام نسیر اہمد کہ نسیر اہمد گُوڑیئے ناما زانگ بیت .

مہلب، ہژدہ دسمبر نُوژدہ سد و ہشتاد و دوا ہئیرآباد کینچ بلوچستانا ودی بوتگ .

تان پَنچمی کلاسا گُوڑیئے وانگجاہا ونتگی . وتی میتگئے ائولی جنک بوتگ کہ اسکولا وانگا شتگ . چہ پنچمی کلاسا و دہم گُوڑیا وانگ نبوتگ، پمیشکا مہلبے پت، واجہ نسیر چہ گُوڑیا لڈتگ و تربت شہرا جہمند بوتگ .

تربتا اسکولا رَند دوهزادوا چہ تربت کالجا سوشیالوجی، ہسٹری و بلوچیا بی اے کرتگ . دوهزارششا چہ بلوچستان یونیورسٹی کوئیٹھا انگلش لٹریچرا ماسٹرز کرتگ .

پیسرا تربتے بازیں اسکولان وانینتگ و دوهزارنُہا بلوچستان پبلک سروس کمیشنے چکاسان سوہین بٹیگا رَند تربتا جنکانی کالجا انگریزے لکچرر بوتگ . اے نیاما تربت یونیورسٹا ہم انگریزی وانینگا بوتگ .

گون لبزانکا بندوک بئیگئے سئوبا نبشته کنگ مہلبے تبا ہمراہ اِنْت . کسہ، نبشتانک و رجانکا ابید نوکین نرمے شائرے ہم .

اے مہلب نسیرئے ائولی کتاب اِنْت کہ اشیئے تھا مہلبے بنداتی زمانگا بگر دان دوهزارہژدہا نبشته کرتگین شئیر ہٹوار اِنْت .



## بیگواہین گوانک

آدینکین ساہت انت

چمان پُرشنت منی

دردئے نمازگا تنو چے گوشئے بگوش

آرس انت کہ ہون اتنت

دیدوکان چلسرین

اے چے اتنت گلین سہرجیگے رتکگات

زی کاگدے من دیست چپرا تگردیئے

بارین اے کئے و کئی ناما نبشتگات

چو جونیا گوشئے پیرزالے پانگ ات

دردے نبشتگات

ترسے نبشتگات

اے کاگدئے دو گال اجکین تنوار اتنت

گوشان نکپتگ انت

کسا نرستگ انت



چۆ زانگا اتان  
تابان يَكَّے اَت  
اے كَپَيِين هبر  
ناسرَجَمِيْن اے گال  
باتيلا سَنگ اتنت  
ارواهئے رنگ اتنت  
اَكساني رُمبے اَتك جُستاني تُوليے  
اے كاگدا چه پد كئے بارين برتگ اَت  
كئے بارين رَيتگ اَت  
كارست گار اتنت  
آدِينكِين ساھتان  
گُوياك تَل كُننت

## هينار

من دمانانى هلاسيئے ابدمانين مُساپر

که نزانان کُنگ

وهدهئے انداما دُرَهگ

هؤرکين وداران نندگ

باز دم برتگان

ريس پر رتکگ انت زردئى اُنچؤ

که همک تابا پدرد انت بچکند

چؤ منا گواتيا مسلِ جمبر

گؤن وتا دور پتاتگ بُرتگ

ما همؤدا گؤن وتى جندا کماَتگ وتى تهنایی گؤن لَبزان

پدا سندان کُنگ

چُنْت بَرا په ترا سر بوگئى جُهْدا من وتا اير بُرتگ

گرديِن اوپارا چَکَرينْتگ منا اُورْتگ

نون پدا جاہ ہما اِنْت من وتی رَنگا آن

تتو اگن اوَسَتْ کَنئے

کَمے منا بلّ تہنا

منی اوَمانئے سَپیر انگتہ اِیر رتکَ نکنت

من وَداریگ ہما ساہتئے پہ وت

تتو وتی چِندئے سَمارا منا پَجّاہ بیارئے

بیا منا شَئیرے بکن واہگا دُریکگ لُوٹان

تئی تہا نکشے من اِپئے سرئے بوگ لُوٹان

تتو کہ سر کَشئے، بگِندئے و بکِنزئے من ترا گُون ببان

## هئور شپ ڪپتگان

ترا چه كار گون شپا؟

ترا شپئے ودار چه؟

مني همك دما شپئے بليت

نون بے ترا

اے هستیے كه نیستیان و دی كُنگ

تئو زائئے؟ ائون هئورے گوارگا انت اندرا

دربگئے دپما

آكشا

اے اكس منیگ انت باتئے

اے ترمپ و آرسئے سیادی انت

دلا رچیت اگان درا

زمینا نمب کنت یا سپنگا منی

بله تئو وهدئے گردشان بدل بکن

شپانی جاها رۆچ کن  
شپئے بلگ وه دیربگین نون آدته  
تتو رۆچان آهگه بساچ و بیا  
بگوار  
دلئه دگار و دنان تر بکن  
منی ودارا تر بکن

## کدھے پُرشَتگان

انچین دردان گُوستگان مرچی

ترا جیڑگ نجیڑگ نون نبیت

ترا ٹیکے کنان جندے تئی

وت گون بان

بیا زندگی دو بر کنان

یکے ہما کہ گوستگ و دومی ہما کہ نون گوزیت

ہمراہیا

ایوک مکن

نہ کہ وتا، نہ کہ منا

چو سر گرگ...!؟

زائے رٹوگ چیا گُوشنت؟

چندئے سیدگ تئو دیستگ آنت؟

اے ہم ہما پییم انت وتا جندا چہ گستا گندگ و چندئے ودار

چو ترمپ و نمبے سر سیدگ

ھئورانی مؤسم بل گوزنت

رندا تئی یاتان زران

چو دل نبے

پہ من زرے جاھے دلا

ھئورانی نمبی سور بنت

زانا دمانے گرتگائے

تئو گریوگئے کارا مکن

دل سگگا دزگت بیت

آرسے بدگ ہم مؤسمے

انگت ودارے آسری

انگت شہازے دم برگ

وہدا چہ پیسر چون بیت

باور مکن بیباوران

آیگ تئی من سازتگ ساہئے تتوارئے زئیمیا

دلبند دستا ایر کتگ

زانتگ کہ من ایوک نہ آن اے سپنگا

أرواہ تئی ڈریگگ منی

انگت تَسَلَا آگہ انت

انگت دلئے سہڑگ منا سرشپ تان سُہبا پانگ انت

بے تئو نیوگ آدئے

بیوار بان بے تئو بیان



## نزانئے هچ آسری؟

همک رۆچ

گمئے کسها چه پد

کوشان

نبيت دگه پدا

بله

همک پدا چه پد

نمانيت هچ کسه

ترا چه پد من انگه پادی ئپان پانگان

وتی

دئيارئے ساھگئے

کجام دران چه آتکگئے

پئرتگئے تئو هستيا

که هر دمان نوک بئے

## پاھار

دلا نون گم نکنت جاگہ

ہمک اُفار زمزیل انت مروچی

ودارئے آسرئے روچ انت گوشئیگا

تتو کائے

انچین اوتاگے مان ستکئے دامنا کشیت

نون چمئے نز کنگ ہیچی نترسیت

دلا پورہ گدے زرتگ مان کونڈان

شربشی ساہگے نشتگ

چون سدک انت

وداری ساہتے زائے مدامی ازر ساچان انت ہمے رنگین

برے گون سنگیا دروازگا شم کنت و نندیت

تتوارانی پدا چکا نترنیت

دلئے چئولان وڑے داریت دلگوشا

كُوشِئِ هَلَوَتَ كَننتِ پابَرَمَشِ سَمارِئِ

گرمیے ماریت

كُوشِئِ نونِ اَتَكِ و سرِ بوتِئِ

چُشِئِ باورِ گُزا، مِهَلَبِ!؟

## سۆزمان

(مُردگین زردانی ناما)

چۆنن زۆراکیه، چۆنن بیباکیه

من که به مانگ آن

انچین بیوانکیه

سَاهِگانی سَپر رۆچا در بُرتگ أنت

چۆنن اِشتاپین رۆچه که اِبر بُکتگ

چۆنن سیاهین شَپه که تَنگی نرانت

چۆنن وابه که هِچبر اے چَم پِچ نِنت

چۆن چراگانی تیلانکا سُههه بلیت

چۆنن اِستال أنت، بُرمشانی وازمندگ أنت

چۆنن اُفارے، رۆچارا دَنزین کنت

چۆنن چَم أنت که انگت ودارا پِچ أنت

چۆنن اۆپارے انگت دلا چه نرئوت

لَنكُكُے ھم چراگانا كُنَّت بكنت  
پورُكُے ھم اگان راھان گُمرآھ بكنت  
بوچُكُے ھم اگان كئورا گُمسارُ كنت  
چُونِين لِيلَامِيے ، ساھئے كَپَّ اِيْرَ بنت  
چُونِين آپے كہ ھونانى جاھا تَچِيت  
چُونِين رَسْتَرْتَبْ اَنْت ، جندا پائنت ، ورنْت  
چُونِين ھوشامے ھونئے دلان تلُ جَنْنت  
چُونِين كُولنجِين دردے كہ مارگُ نَبِيت  
چُونِين بچكندگُ اَنْت كہ پشومانُ بنت  
  
چُونِين ارسُ اَنْت كہ ارواھا اِيْرَ بُرتگُ اَنْت  
چُونِ اے بِيَكُنْثُگِين پُلُّ سِنْدِگُ مَبِنت  
كُيَا رَكِينان ، بِيْمَلَّئے سئودا مَبِيت  
چُونِين دُرُوكِين تَسَلَّا وَا داتگُ اَنْت  
كُيِي مَن چُنْدانُ چنان ، اے مَن اَنْ ، پُرْشْتِگان

کئیا تۆنۈ جنان، كئى ميارىگ بىت  
 من كه لىلامئى تھتا وت آن، بستگان  
 چۆن من آسودگ آن  
 چۆن ودارىگ آن من  
 چۆن نكَنزان، نَجْزَان، من شَر نِشْتگان  
 من كه هئيران و وانگ آن، اَجَب كِسْهے  
 مُردگ و سِنگين اَكسان گۆن تُرانا آن من  
 كئىي من رُزْنئى و دارا چراگان كُشان  
 كئىي من اؤبادگ آن كه وِيا كُت كنان  
 من اَجَب مُرتگان  
 من اَجَب جۆنۈ آن  
 ايوكا ساهئى بَنديكَا گُك بستگان  
 چۆنِين زۆراكِىے  
 زردئى مرگا زَران

## سپر درد

آبیتکی بچکندا چو گوریگا سِنَدیت و دانگ دانگ کنت

درد چیندک چنان کنت

تان کویگان سر بیت

بارے بیت

باز گرانین ساهت أنت

بله چو گئے آبا ایَر رثوت

اے کئے انت؟

ناگمانین گمانانی باهوٹ کنت و رثوت

ساهت أنت

گیر أنت

تقوار أنت

گمان پر رچان أنت

هئیلان پتاهان أنت

گوستے ساهتانی دریگان لهتین بچکند نُکیت

گوزیت

دریگ شم بیان بنت

در پیج بیان بنت

ألوتین لزت أنت

لهتین لبر أنت

أبیتک کننت

چم و ارواه تجنت

آسرا انسرننت

تعو که در کپتگئے

اے هما ساهت أنت



## هستی

زند تَرهگئے شوہازا سَرَسَرِ جنت

بلہ در آگہیئے و ابان آسَر نیست

وتی جندئے هستی ہم چو بدواہین ماریا ارواہئے سرا شیپ گران و پتاہان انت

زند دُرُوگے

زند دُرُوگے

پَمیشکا ڈٹولدار انت

چو بریئے بُنا ہزار رنگا سینگاری بکن

بلہ گڈسرا آپ بیت و رچیت

هستی ای بیباور انت

## هۆرك

مرّچى دل

واھگانى كبرستانئى كشا گوستگ

نزانان من وتى چّم كجا كلّ كُتگ أنت

آساھت شپىے ات

أرواھ پدى گامان جُزان اچ دمانان در كپت

مرّچى چپئى شۆھاز انت؟

ادا ھئورانى گوارگ

مؤسمى بھرے نہ انت

زمينئى تلوسگ تْزندين رگامى واھگے

كبرانى سارتين دُرؤشُم انت

مرّچى شَموشگ بيوت انت

أرسان ھئوار انت بيوسى

درد أنت كه جمبر بستگ أنت

گْپونت دلئى كبرئى سرا

## بۆشت

انْشِپى

استال هم چه چُلپا

چست بوتگين دوتان

أجب أمبازتگ أنت

أنچؤ گوشئ سېرپا منى كئشئ دريگئ شيشگا

مُساپرېن سھبنا

سارتېن گواتا نمب بادېنتگ

دُنا ندارگان مملېن سربگ پؤشتگ

سورمگين بامگواھينا انگنه رؤچ مان شپئئ گدئ أمبازان واب إنت

ھمئ پئيمېن شپيا، ماھئ چاردھا، دريا اچ وتا گيشيئنتگ

كشك كئشتگ

من هما رُژنائين دمانا گام جنان اچ وتا دور رئوان آن

تئو بله

ہمے نمبین چادرے  
ماہکانے ارواہے  
من انگت سپرے لَنکُک داشتگ  
بلہ کُجام چیزا گیر نیاران  
کہ تئی ترانگانی گامان بداریت  
تند بَندیت  
چو نمبے گُشانا  
انگتہ بلّ ہیچ مگُوش  
انگتہ در بستگین بیچارے  
بیوانکیے  
بیوارے گُپا مکن

## چۆ مكن

سراتئے پُهلئے

مودى ئالئے نياما

دلئے اوشتگ

نه زورگ بيت، نه دُرؤهگ بيت

نه جُنزگ بيت، نه دارگ

سئوابى كار پرمائے دلا؟

اے انچين كهر و زؤراکے وتى جندئے كُدينگ و شترين كار انت

اے زهمئے ساھگا زؤراکے ريشكنديت

نَمَنُوك انت

## Pendulum

وَشِيَا چہ پیش و پدے

أَبْدَمَانِينَ دَرْدِيَا زَنَدِگِ آن

گُوشے دور زمستانین واهگینے پد گیتگ

اُوشَتَاتِگِ رَنگِ و بُو و تَامَانِي اَكْسے چَارگَا آن

هَتَمِ دَمَانے

مُوسَمے نِه اِنَت

اِنچَشِ گُوشے کُلُو اَتکِگِ کِه

اِمْبَرِي تَاکچِنْدَا تُو وَا تَر بے

و مَنَا مُوسَمِ بَهَارے گُوزگئے اِشْتَاپِ اِنَت

## مہر ترمپ

آلوتین دمانیئے نیبسیگا نشتان

چکپدان ہج نمتنگ کہ پدا واتران

دیم دریاے گوشئے نکش چتگ بینکشین

جنگا گون بیئے، گون نہ ائے، چون رثوان

زندئے اوژناگا آجب آکس منی دیم کثیت

چینچک جست آنت کہ پدا ارش کننت، مان بندنت

ملکموتین دلا هکَل شمشتنگ چینچک

سگے ہمراہ کتنگ، لئئے وژا

نون چدا سر گپتان

بله

چکپدان هورکیے ہم گواہ نکنت

زند وہ دریاے، ادا نکش کدی پشت کپنت

اے گٹیابے چدا پادانی پدان گوات برنت

دَمَانَّے دَارِگ مِبوتِینِ کِسَّه

اے جِنْدَے اَرَوَاهُتے بوتِینِ اَکسے

بله نبوگ

اُهِ نِبُوگ

بله اے مَوْسَم نہ اَنت دلّے بِنْد

اے اَس و اَپ اَنت

دوِینِ اَزَاب اَنت

نہ اِنت تَعِی تِرَانِگ اے مرگی نَتُویت

اے زِنْدَے رَوْلَه نَبِیت بامے

اَزَاب تَاچَّے

یا ناچَّے شَادَه من زِنْدَے جِنْد اَن

مِنَا شَمُوَشَّے کَجَا رَتُوئے تَتُو

من جِنْدَے جِنْد اَن



## پَر رِچان آن

اے اَلوَتانی دَمانئے گَپّ اِنْت

کہہ بیسَمار اِنْت

مُدّام جیڑان تئی تئوارا کہہ بیسوار اِنْت

من چینچک پُشتا شُتان نرانان

دو نَزّین چَمّے

اے نَزّین چَمّانی پُشتئے وابان

بزنانان باید

اُہ نزانگ

زِرّے پناہگ چہ کارے شَنک آن

تئو چَمّان پیچ کن

اے کئول زندئے کئیارا داتگ کہہ زندگ آن من

اے زندئے کسہ ببنت گون من

اے آس و آپ آنت

درُھین آزاب آنت

اے زندئے جند آنت نبنت کِسہ

من پدَرہانان تئواری آکس آنت کہ پر رچان آنت

## زربام

وَشَى دَمَانِي كَسَّهِي

مِهْرِي اَتَوَل چَاڑِي وَرَا

مُرَكِّي اَتَوَل بَالِي هَمَا تُرْسِي وَرَا

بِيكُوَاهِ بِيْت

زِنْدِ بِيكِيَهِي

دِيْمَا شَبِ اِنْت

بَامِي وَدَار

زِنْدِي سَمَار

تَان كَدِ وَتِي جِنْدِي تَهَا

مَرَكِي وَ زِنْدِي جَنَكِيَا كَتْرَه كُوَزَنْت

زِنْدَا بَجِيژَانِ يَا وَتَا

يَا كِه تَرَا

هَرِ دُو تَتُو اِي

من بے ترا زندگ نہ آن  
زندئے ابدمانی تئو ائے  
اے جیڑگان  
اے مؤدگان  
بلکین ببوتین آسرے  
تئو هستیئے شئیرے کتین  
نؤکین پدا  
زانان نبیت  
وشی گمانی ساہتے  
زورگ نبیت  
دُرؤہگ نبیت  
زندئے ہمک دردئے وڑا  
شپ کِنزگا بیہال کنت  
شپ درد بیت جندئے وتی  
دردی زرے

دردی تہارین زیمِری  
من زیمِری ارواہئے زئیم، اے ساہتان  
سازیت منا پہ دلتبی  
پر بندیت هر شپ یک وڑے  
بارین زہیری سازے آن  
یا مؤتکے آن من زندگین  
بچکندیئے

## گردام

من چينچك اڪس ڪشتگ

دلئے بله

اے زئيم وئپ

همڪ دمان نوڪ بنت

آ رنگ نه انت

## زندرنڱ

منى ڪوڙيئي ڌريگئي آ ديما آڪسي هست

چرايا مرگاني تنوار ڪثيت

بله

ڌرچڪاني تاڪ نسرنت

چينچڪ ڏولدار انت بيتتوارين آڪساني زميل

ڌرچڪاني آشوبي تبئي ڪسها ڪارنت

آ وتي براني باران زرت ڪننت

ڌرچڪ ڌرديگ بنت

ايشاني براني سيندگئي وهدا

ڌرچڪاني مارشت الم انچش بنت

کہ

اُچ ماتیا چُکے سِندگ بیت

دُرچکانی چیہال

اُجب بیٹوارین اُکسے

منی کوٹئیے دَریگئے آدیما

اُجب بیٹوارین اُکسے چیہال جنت



## وتارا بر گون

زندئے اؤشتاتگین وهدئے پُشتا

گامے

بس یک دم بُرتگین گامیئے کوپگان چه کپیگ

بلکین منا بندیگئے آ دستا دئور بدنت

که اؤدا واهگ نوک أنت

درد دمتؤس أنت

وشیانی هتم ساز انت

زند زیمئے دُروشم انت

بله

ودارانی پانگی وش انت

تاکیچنڈا نندگ و بهارئے لرتانی

وشین بؤانی

دُربین رَنگانی ودار

أَجْ بَهَارَئِ مَوْسَمَئِ جَبْرُكَانِ وَشَتْرِ اِنْتِ

مَنْ نَشْتِغَانِ

تَثْبِي نِيَاهِگَئِ پَانْگِي وَشَتْرِ اِنْتِ

چَه بِي اَسْرِيْنِ اُمِيْتَانِ

بَلَه مَن سَدَّكِيِي بَسَازَانِ

اِنْگَتِ دَلَا هِج سَپَرِ نَكُشْتِگِ

هَمِيْنِچَك رَاه اَنْتِ

مَنْ سَرِگِرَانِ اَنْ

تَتْو كِنَزَانِ اَيَّ

بَلَه اِي سِيْتِكَارَا اَسْر نِيَسْتِ

اِي دُرسِ شَرِّ اَنْتِ

اَكَاَنْ تَتْو بِيَاَيَّ

بَلَه

دَلَّئِ نُونِ اُمِيْتِ اِيْر رِچَانِ اِنْتِ

نَدَارْگَا اِنْتِ

بله من جیڑان

بله من جیڑان

من جیڑگا آن

شُتئے تئو شَرِّ اِنْت

تئو نیائے شَرِّ اِنْت

منا ببر گون

ودارا بر گون

## بله اے زیملان بلیت

هر رۆچیگین نِدارگ

هر رۆچیگین بَرَن اَنَت

دَمان جُنزان اَنَت

بله

نه نِدارگ بدلَ بنت، نه بَرَن تَرهیت

تَسَلَّا تَرسیا تَبِیت و اب گنجیت اَدارُکے

بله سَعوتے و تَن نامیت

هَمُک کُنڈا سَپر کنت زِیمَرین مارشت

و بیگُواهیانی بَرّناکین کِسّه بَرَن رۆدینیت

لَتَّ وارتگین و دَار اَنَت که چَمَّ لَتارنت انگت

تَبَّ تان دردَ مَثائنت

أرواه هیلَ کنت سَگگ

نِدارگ مَثَّ نَبنت

نِدارِگ

لَهٗژ و پاھار اَنت اَچ نِگاہان اَندرا بُکنت

اَندامئے جان اِیرِ رِچیت

بله مرؤچان اَچ مُردگین چَمّان

زَدگین ارواھے سَرُکُ نَدنت

اَپسؤز بیؤسی

دلانی اِیرِ رِچگ بس اَدارُکی گَپے

پدا هما درد که بچکندنت و پدا کَندنت

بَژنانی مَرگ هم دَمائُکی کِرِد اَنت

اَرمان مُردگی

نِدارِگ مَثُ نِبت

په چَمّانی پر تَرینگا

بله باهَند اَوکارنت

هَمک رُچ

نَلوئیت بَژنے رُودینگ

ہمے یکین دردے آپسوز و ترہینگ

ہما بزن انت کہ سر کشیت

«بلہ اے زیملان بلیت»

کش و کران

ندارگ تان ہمے ماننت

ہمک روچا

تان ابد و ابا

تسلا ترسے چنڈینیت

## ندارگانی نون چم نر انت

ندارگان تئی نِگاہ نِکش اَنت

اے راہ ہما اِنت کُوستگئے

مَرّچی بیسماییا

گون وابئے نرین دیدگان، گون آگہین ہیالیا

چو وهدئے رَنگ مٹ کُتنگ

ندارہ چارین راہ و رند

تئی گوزگ اناگھا

کجا شتئے؟

او جڈیئے جُرانی رَنگ

اے ہونی بو اَنت، اَکس بنت

بام بنت کہ رؤلہ اَنت

دوین دلا نون یک وُر اَنت

اے گم منا کہ نرکا برنت

و لِرَّتِي دَمَانِے پُهَلْ بِيْت  
 وهدئے تَتْرَگ چدا كپانَ بِيْت  
 دلا اُون دَوَزَهے جُشِيْت  
 بله نون سارَتِين سِينِگے  
 ودارئے نَزْ اَنْت هر دو چَم  
 سَپَر مُدام دِيم په تَتو رَهَادِگ اِنْت  
 بله كُج ائے؟  
 كجا شُتئے؟  
 من ساھِگَانِي سَنَگَتِي  
 و كَتْرَهَانِي گَپْ و تران  
 پِيْتكِگ اَنْت  
 نون اِيوك اَنْ  
 ودارئے نَزْ اَنْت هر دو چَم  
 نِلَوْتِگے كَلَو كُتِگ  
 نَثِيَايِگے ودي كُتِگ



## ناجائز

مِهَلَب!

تَمُو نَزِينِ چَمِ دِيسَتِگ؟

هَمُو، مَن نُنُكِي كَبِرِے كُتِگ سَرَكُوَز

مَن زَانَتِگ

اِدا كَلَّ اِنْتَ اَرْمَانِے

دَمَانِي لَزْتِے سَاها زِبَهْرِيْن

هَتَرِ دَاتِگ

كُتِيَا مِهْرُے بَرِے سِيسَتِگ چِگَلِ دَاتِگ؟

ش...ش...ش...ش...ش

اِدا مِهْرُے مَكْرِ نَامَا

اِدا بَسِ زِنْدِگِي دَسَخْتَانِ بِنْدُوَكِ اَنْتِ

ہما جاہِ انت

ادا پئیوند آدمزاد چو دَرچکان

چو مچان گُش کنگ بنت

دو بدن ایوک

ہمے تپہ پکارِ انت؟

ہئو، آگان انچش مہوتین تنو منی پعیما

گمانا پُل نچکّت و اے گونڈین کبرے دلبندا نجیڑت ایر بوتین پُل

گڑا، کبرے نشانے چے پکارِ انت؟

اڑے، تنو شر گنوک ائے

بنی آدم کہ ساہ کَشیت

بلاہین کِردئے واہندِ انت

کجا کارا وتی دَبیت، تَمردین

ادا مہرانی کِسہ چو ہلاسِ انت

بلہ

نون بسِ انت، مردمی برمشے

چدا پاد آكه بلكين تئى هئىالا هم ترا مئىلئت

كئىى كبرئى سرا نائى؟

## گویاک

مُرگے لَبزِ کنت مُدام

دَریگئے دومی نیمگا

منی دلا اے یِکّوی

تتوارئے یِکّین زِیملِ اِنت

نَزانان چُونین کِسّہ اَنت

کہ یِکّین لَبزی کنت بنا و یِکّین لَبزا اَسرنَت

بَرے اے لَبزِ نَوَدَ بنت

بَرے اے درد و دَوَرِ بنت

بلہ اے مُرگ چے کُوشنت؟

کُجام دردا پانگ اَنت؟

کُجام وَشّیا زَرنت؟

بَہارئے مَوْتِکُتوانِ بنت کُجئے کُجئے؟

ہمے وُڑا اے زِندگی

ہمے وڑا اے سیادی أنت  
اے گوست مُرگی بانڑلے  
کہ اچ کتابا در کپیت  
برے گلابی تاکے زند  
مؤسمانی تُرائگے  
کہ تل تل و بُران بیت  
گیر، و شین بؤ بنت  
کتابا زندگانیئے  
برے اے بالی تُرائگ أنت  
برے کپوتی نالگ أنت  
سَمارا لَہم لَہمین اَلوت أنت برے برے  
اے زندگی رتوان کنت  
بلہ نشانا اوشتیئے  
مُدام هر دو چم کپنت  
بلہ گمانا گوستیئے مُدام یاتے زندگ انت

## مۆكۆ

هئىيالى دامى زندگى  
چۆ مۆكۆئى كُدامينا  
تنگ هُدايا دىستگ و  
تُهپىنتگى په آدمئى اُزىنگا

گُمانا مان گىشْتگ  
دو گاما مان گىشْتگ  
چۆ گرد گردا تَرگا  
هُدا اُون مان گىشْتگ  
چۆ مۆكُوا  
بَرى يك جاگه شُتگ  
په نۆكبن دامئى سازگا  
هزار رنكا مئْتگ

جتاین رَنگ اَندرا

جتاین تهر و دُرُوشمان

وتا چه در

برے هیالی تُکرے

و سِنگے تراشتگین برے برے

کدامے رُوجا شَهَم کنت

و دُرینئے دُرُوشما تُرپیت

شپان گمانی رَنگ بیت

پَتاییت زندئے شادهان

اے دام هستیے گُوشنت

هزار رَنگا بُراهَ دنت

اے رَنگ دُرس واهگ اَنت

دُرُهین هُدائے بَسَتگین چو مۆکزی کُدامیا

دلانی سیادیانی دام

مِهَرئے مارگانی دام

کست و کینگانی دام

کُھت و دُرّوہگانی دام

بَرن و سوچگانی دام

وشین لِرَتانی دام

پہ ارسینا میچاچ دام

چو مۆکوئے کُداما بالوئے

کہ پلپٹیت و ساہ دنت

اے زندگی تان زندگی انت

هُدائے داما در کپگ ودی نبیت



## گُبارِستان

کجا مِهرانی کِسہ گُنگِ ماننت

دلئے مؤسُم دِپا سَبزنت گُرا لَبز اَنت

پدا واہگ کجا مانیت؟

پدا دارگ کجا داریت؟

بلہ دل کُودکے ، اُفَارَ کَشَّیت

پدا اَچ دیدگان سَبزیت گُئیایے

پدا مِسکانی دُزگ؟

پدا مِہلب نَشنگنت؟

بگندئے در کپئے اَچ راہ و رَندان

دَمانے

بَس اَدارے

بلہ راہانی نُوکین نَپَّ ماننت

بگندئے شَپجَتے استالَ سِنَدیت

بلہ دردانی سیاہین تُرسِ شاننت

بگندئے کوزہ لہم آنت مسلِ پُکّی

بلہ بیگواہیان گڈگ بلاھے

بگندئے مؤسُمان سہتے وِپا کُت

بلہ گردین

ہما گردین لکیرِ انت، پدا کاریت

نزانگ اچ کجا زانتے شُہازیت

بگندئے زانت و واہگ سَک جتا آنت

بلہ واہگ نزانگ؟

بگندئے زندگی دردان نماریت

بلہ زندئے تھا دردئے نمارگ؟

چُشین مُردگ؟

اَجب ساھے در آہگ کِرِّ بندیت

آزاب آنت

دُرہ آزاب آنت

ہما کہ کِشکَ رَندیت

ہما تیلانکَ سَگیت

بگندئے واہ مٹنت

بگندئے راہ مٹنت

بلہ اشکئے مُساپر

کجا تاہیرَ پُنت؟

بگندئے بیوسی اوستا بدرؤہیت

بگندئے اوست وت بیوس بمانیت

بلہ انگت دلے کہ پھرَ بندیت

بلہ انگت جُرانی نمبَ شَنزنت

بلہ انگت گُباران مَلَمَلینان

وسے اُفان گون اُفاران کَرُوجیت

وتی ہاکئے شَمُوشگ؟

پدا ہاکا ہئواری؟

پدا مارشتئے مانیش

ہمینچک ایوک انت ہستی گوشے یکے نمنتگ

وتی جندا گون پندل

وتی جندے شگانی

آجب زندانے واہگ

بگندے جون سہڑیت

بلہ ارواہے دوزہ

ہزاری واب سوچیت

بہشتین واہ بریجیت

بگندے درد چنت

بلہ دردان چہ چٹگ؟

وتی جندا چہ چٹگ؟

## آپرنگ

برے برے ہلاس بان

نہ گوست بیت نہ آسرے

نزانان کئے انت ایوک انت

منی کشا

کہ پش کپیت

نہ لبرے بیت، نہ نیست بیت

نہ دز جنگ، نہ گار بیت

کہ لہم لہمین سارتیے سمارگا ہٹوار بیت

رٹوگ نزانن، درا نبیت

چو بیژبانین آلوتا

چو گواتی لہمین ترمپیا

سمارا ایر رچان بیت

دلئے تھا کدان بیت

ہمے دمان بیوس انت

كُوشَے تَتِيَابِ كِنزِتِگ  
گُون ژند و پِنديِن جُهديَا  
وتا زرا يله كُتنگ  
چو مُرگي بالا سِستگين من بانزُلا هزار بر  
دلاني اوست ديستگِانت  
كه وانگ وانگا نِشتگِانت  
چو لئيبِوا زِبهرين زَهگيا كُرتكگِانت  
بله من آن كه په وت آن  
وتى كِشا  
وتى تها  
كه نِيسَت بان  
همؤدا تتو رُدان بئى  
چو اوستيا

## لۆلی

تئی بیوانکی آسر بوت

هما بیدانکین گپ هجبر نرستنت په منی گوشان

بله من مارتنت

منی لۆلی

مُدام تتو چۆ منی ارواها تُتنگ

منی کُهتے وژا بیوانکا کَل بوتے

منی بژنے وژا مُهتاج در کپتے

بله نون گیر کائے

تئی جاہ چۆ منی هۆرکین وداران انت

نرانان چۆن من چه تتو بیهبر بوتان

نرانان چۆن نپهت چینچک نازرک ائے

اے تَبْدِیْنِ كُوَات

تئیى چوْن مُرْپَدِیْنِ رَنگَارَا مَثِیْنِیْت

مِن زَانَانِ یَكِّ وَ تَهْنَا اے جَهَانَا

تَرَا مِّنْ گِیْرَ كَارَانِ

مَنِ بَیْوَانَكِیْنِ نِیَادَانِ یَكِّے گِسْتَا بُوْت

مَنِ مَاهِیْگِ

مَنِ لُوْلِی

تئیى جِنْدِئِے وَرَا اَنْ

اَنْچُوْ بَیْوَسِ اَنْ

اَجَبْ جِیْزَانِ كِه وَهْدِے مِّنْ تَرَا جِیْزَانِ

مِنْ سَهْدَارِی تَرَا جِیْزَانِ

اَجَبْ ائِیْبِے

اَجَبْ اے بَرِّنَاكِیْنِ

تَامِے

كِه نُكَّانِ جِئُوْرَ چَاشِیْنِیْت



منی نازرکین لؤلی

من زانان آچ ترا هچبر نبان بیہال

منی نیادانی جاگہ

منی تُرسانی مہرم

تتو چینچک بیتئواریا منی دل گوش داشتگ

بلہ زانتگ رتوئے تتو

کہ سہداری مزن ائیے

تتو شگر انت آچ منا پیسر شتے

تئی مہرے کہ وت زرتگ، تئی کھتا بران گون وت

بلہ تان زندگان

ساہا نہائے بندوک

منا چہ پد ازن مانے تتو مُدامی منی شئیرے تھا ہستے

منی ماہیگ، منی لؤلی

منا تتو گیر کائے

تئی بیدانکین بیوانکی مُدامی نیاد سازیت

بله اے زندگی

کہ رُوچے کُھتے سہڑنیت

ہما کُھتان چہ یَکے

تتو

منی ماہیگ، منی لولی

## کئے نون تئی رنگا بجنت

زندگی کترہان شُمارَ نکنت

یکوی اچ منا سدگ لوٹیت

گون ترا وهدئے دامنئے لمبا اُمرِبا نِشتگان ودار کُتگ، نون منا پیچ مگر کہ درد کنان

اچ ترا در پہ در بیان روچے

پہ کئیا دیدگان شہار دئیان

کئے ترا پہ منا بچاریت دَمے

کئے منا ساهئے جاگھا کَشیت کہ تئی وَشبوآ بہ آتاریت

کئے منا لَنکُکانی پئوران چہ پہ ترا لَہْمُکین سَمارے بکنت؟

کئے ترا زَنملا بسازیت دَمے، من ترا وهدے اِشکنگ لُوٹان؟

کئے منی لُنئے باتنا پئیت، و منا تام کنت تئی تاما

من بلہ انگتہ ہما پیما

تئی دُرہین گِلہانی باپُشتتے سارٹکین نمب ایر بران کُنت

و وتی اَنَدرا دگہ جاہے ارس یک کبرئے کشا گُورتنت

دل منا رۆك رۆك چاران آت  
آچ دلا پُشت مان دات، شُتان  
بِيا ترا دور، آچ وِتا گِستا، كَمُكے گُون وِتا بَرگ لَوِتان  
آچ وِتا نون من سر گِرگ لَوِتان

## بَسْتِگینِ دَر

هۆرکین بام و رۆله أنت

چَنکے درد أنت

تُرْمپ تُرْمپا

مِچاچانی گیندیا پالاتگ أنت

لهتین بیوانکین و داری تُرانگا

بستگ گُبار

هۆرکیا آنچۆ چکارین اندرے

که گمانگ هم کُدیت

رَنگ و بۆ أنت شَنگ و شانگین دیدگان کیشینگ نینت

واهگانی جۆن ڈونڈا سَرپتگ أنت

دل اُمیت أنت هر سَباه پُلا سَرپنت

و بیگهان گیمرتگ أنت

لہتین اومانین سپر

انگتہ سر گپتگ انت

راہی نبت

شپ کپتگ انت

ہستیئے جند انت گوشئے کہ ساہگے

مارگ نبت

نشتگین ساہا شمشتگ جنزگے

زندگی ہم چے و چنا پانگ انت

## آگان

من تئی درد و زهیران چه دَمے سر گُستان

و ترا نۆکین دگه رَنگیا مارگ لۆت

بچکندت

و پدا بچکندت

بیوسی دستا شہاریت

و منی آرواہئے هاکا دست جنت

پُلکین بیت

أندیم بیت

چیہالان پرنچیت أندرا، تئو انگته واتر نبئے؟

شر انت، مبو

بس یک برے ایمن بکن

واتر نبئے

هر دو آزاب این

تتو و من

اینچک منی اے زَنَزَرگ

اینچک تتیی نیاہگ مُدام

ھوَرکین زرا چٹولے سَپر تتو دیستگ أنت؟

اے تتیی ودارے ساہت أنت چمان منی

زانان تتو بے من ایوک اے

زانان ترا

بے من نبے

من گلہ آن

وشان بان

بیائے اگان



## ڈریگتے سپر

دل گُوشیت اچ و تا دَرآمد بو  
رہگُوزی ہم و تا مگند و بگُوز  
پہ و تا یک برے اؤن چکّ مجن  
و وتی نامے مردمے اؤن مزان  
و وتی شہرا دَمے مان متّر

## شَرِيشْئے ساہگئے بر

تتو زائے؟

شَرِيشْئے ساہگا، نیمروچئے ٹاکا

من و مہلب، اتول رندا

دُچار کپتین

من نیما گون کٹورا

و آ

نیما سوچئے تابا گون بندوک ات

کتابئے تاک گواتا لئیب داران ات

و مئے نیاما

منی پت آنگتہ ورنّا ات و ماتى بیوسى واب ات

ما هر دو

هئو، من و مہلب

مُدَامی وَاَبَیْے دُمْبُل دَاسْتِگَآت

شَپَادِیْن پَاد مَلَانَا

بَرے یَک تَابِیَا دَکَا وَرَان و بَرے پِیْشُک کُتُورَے سِیْسْت و دَنْتَانِے شَمَا گَم چُنْدِتَنْت

نَرَانَان چَے اُن جِیْزِت

کَدی بَیْگَاہ وَاَتَرِ بَیْت؟

کَدی مَاتی پَسَا دُوشِیْت؟

کَدی مَن چَاه گُرَادَان؟

پِدا دُوتَانی تَرُومِیْگ

پِدا اَرَسَے هِیَال و تَرَانْگَا کِپْتَان

مَنی دَاسْتَانِ یُوسُف

دُور کِپْتِگ

زُلْعیْخَه زَار و پَرِیَات اِنْت

و یُوسُف هُشْک و هِیِرَان اِنْت

پدا جے بیت؟

منی نیمروچئے بیوابی

کجا اے یوسفا داریت چہ زندانا

کجا پشکئے آ دیمی دامنا دریت

زُلیخہ بلکین رگیت

بلہ مہلب...؟

بگندئے زندگی مہلب نرودینیت

پدا کہ هئور گوارنت

و کَنڈُک آپ لَرزیننت

پدا کہ شپ کپیت دنیا

شریشئے سارتکین پُلانی وَشبو

منا آزاتیئے آتارئے لہمین تُرانگان گيجیت

تہ جیڑان

مَرّوچى دُرس پير اُنت

منى ماتى

منى اُبا

شَرِيشئى ساھگ و دستئى منى گُد

منى سوچن ، منى بئديگ

منى آ داستانِ يوسُفئى نيمروچئى وانگ

منى ارواه

منى مھلب

ھئو

سَد دُرِگَتين من داستانِ يوسُفئى وانگ مزانتين

جلين نيمروچا بوپتینان

## پُھل

اے مؤسّمانا زبان پر بیت

و دردِ وائنت

منا گون زندئے ڈرھین آزابانی کِسّہ آنت کہ ما چو جتا این

ترا گون زندئے ڈرھین اُمیتانی تاک نمب آنت

کہ درد سبز آنت

نون تاک و بر کن

ادا نون ایوک آزاب وئیل آنت

منی شہازا

تئی شہازا

و مئے شہازا جتا جتا آنت

## *A walk*

من و شپے دَرآمدی هئواربا در آتکگین

دَرآمدین تَهاریے

و شینکئے لمبے سیاهیا دَرآمدین، لگشتگین و چُنڈ چُنڈین آسمان گون ماهیا دَرآمدین

رئوان اتین

و دور مئوجرین نِدارگا دَرآمدین نِگاهے شانک دات

و چکی جت

مِچاچان یک و دو بران اے دوریانی درد لَهَم لَهَم چُکنتت

تَهَار کُت

نِدارگان دَمانے اچ هئیلئے رَنگا دِرت و بُرت

من انگتہ دَرآمدین شپے سَمار و رَنگ و بؤا گار اتان

بَرے بَرے

من و دَرآمدی اَنَاگَہا سُبک سُبکا دور دور

من پیسرا و آ پیدا، برے دو گامے دوریا

برے برے ہٹواریا

دو ساہگا رٹوان اتین



## وتكشى

هَمْك دَمَان مَرَكْتِے وَاہِگے مَنِی تَهَا مَرِیت و رَثُوت

مِن اِيُوک اَن

و زِنْدِگ اَن

جَهَان گُنْگِين اَكْسے و مَن لُنْٹَوَانِين چَمَّے اَن و تِي تَبَا بَزَانْت زِنْدِگَانِيئے بَرے وَرَبَا وَنْتِگَاَنْت

تَعُو زَانْتِے يِك يِكَا مَن دُرْهِيْن اَزَاب سِيسْتِگَاَنْت

تَعُوَامِيْن دَرْد چُنْدِتِگ، كَرُوْتِکِگَاَنْت

و بُرْهَنْگ اَن

## سرپد آن

مروچی من گون مؤلمان دلے تبا هنر کنگ

پدا

ما تاک چنڈتگ

گلابین گلابیئے

کائے

نیائے

سیستگ و ودارئے دل من چنڈتگ

وتا گون دروگ بستگ و

تان دیرا ارس کندتگ

## وتا مروچی راه بدئے

مروچی دُرس اَتکگ اَنت

سَمینئے نمبیں تُرانگ و بہارئے گڈسری ملار

دورین ہلکیا گُوشئے چو کاڑے مہپران و تِیگان شنگ کنت و تاب دنت، پدا سماریت بال  
دنت و تھک دنت باتنا درامدین دُرہین ہئیالان زُلیئے ٹالان سِستگین پتاییت لَنکُکئے سرا و  
دور گواتیئے میار کنت دُرہین سَمار و وشبوان سِنَدیت چہ و تا جتہ کنت

اے مہپرانی منگلی چو گِردین سَکئے شاریا کجا کجا اڑان کنت کُجام دار و دَنگران منی  
آزابین بہتیئے رَسیت و شپ کپیت، گلزمین گون آزمانا دور دُکیت ساہیا

وتا چہ من شزار بان

ہمؤدا روچ مئوچر انت گُوشئے برے برے کہ جاہے ساہگا کپیت و جاہے جاہے شہم کنت  
اے زندگی دو رنگ بیت اناگھا

اے دل گُوشیت ترا نبیسان کاگدے

گون وشبوانی مؤسمان گون تاجگین بہاریئے ہمک نِدارگئے تئوامین رنگ و جلوهان

گون واہگانی مہرمین ہئیالی تُرانگئے زرا

گون سنجئے دُریشناکین مہرگانی پُشتئے دُرستین رُزن و شہمئے دُرؤشمان

دلا بله هئبال كت كه چش نبیت امبران

نشزنگ شمشتگین گمانے آکسے جمبران، نان گورتگ هئور و هرگان، رگام و تانهی

جژان، نه دروچک نئے كه گولوان، نه کبگ نان کپودران، کپینجران، نه بلبلان، نه

شانتلانی بانزلان مدامی بال گون اتنت

نه زیملانی ساز پینشیگین ورا اتنت

اے درس مٹ بوتگ انت

اے کلین مرچی جیژگان ودی کنتت

بله من هچ کلنو نکت

نان مهپرانی ساهاگا

نان جمبرانی نمبیا

نان مؤسمانی پڑشتگین هئبالے شیشگانی تُکران تئبا ریکے ماژبا سرامدین گوشے من

چارگا اتان... وتارا مارگا اتان

ودارا انچو بیوس آن

کدی دُران...!؟

کدی منا زِرے پدا کُلتو بکنت

جُشان آن جِندئے اَنَدرا تَچان آن هُونئے جاگھا چو شیرگا

پدا من جاھے گون وتا دُچار بان

مَرّا کنان

و سر گران

ایوکا

و بے وتا

بله ترا چه پد اگان من زندگ آن، ته مُرتگان یا ملکموتا پانگ آن

## رؤھیل

چینچک بیتوارین جُھدَ کنئے

ھچ نگوُشے

سوُج دئیے

من دلا زانان کہ چہ تتو بدتر آن . . . تتو آج زبانا کُنْگے ائے

و من وتی پگرانی لِّلک بُرتگ

آہم بزبان کہ دستِ وت

تتو سَجھین رُوچا وتی جنْدے تبا ہرچی گوُشے

وت سَرپد ائے

یکے من آن کہ گون وتا ہرچی گوُشان زندے تبا ناسرپدین لئیوُکے آن

تتو یکے ائے دردا وتی نارے و سگئے اندرا

من یکے آن کہ گون وتا ہر رُوچ مِژان بیوانکیا

جندا وتی ٹپی کنان گون کندگان

رؤھیل

یُیا گُون ترا رازان دلّے لَبزان کنان

بِیباورِ اَنت، پیداورِ اَنت کِر و گورے مردم دُرھین بیدِ ترا

من زندگِ آن هستی وتی من مَرَتگ و زانان وتا، دودان منا بَرگ کُتنگ

تتو اِشکُنئے؟

دلگوشِ اَنچو گور کُتنگ، زانا گوشے تتو اِشکُنئے و سرپدِ ائے

بچکندان کَمے پہ ترا

یُیا نون دگہ گَبے کنین

تتو اچِ منا گویاک و زانتا زور و بر

جُهدئے وتی یکِ رزھے هئیرات کن تتو پہ منا

رؤھیل، او جانِ مہلب

شُگرا گِران تتو کُنگے ائے، اهدئے تَبے رَنگا جنئے

## ودارمئیت

ترا گُوشان که تئو پدا نئیاتکگئے

ترا چه پد دَمگ نون وهدا پیش پیریا سر انت

گُون و تا دُرُهین آزابان ساز کنت و زئیم و زَنگان مَوْنَدَریت

موتک وانیت، زار کنت

کُهت بیت که په چیا من زندگ آن، بله ودار زندگ انت، کجا مریت

نون دیر انت پر نترگا تئی

نون نوکین رنگ و داب زاهر انت

نون ادا مؤسمانی ایوانئین

دُرُشما سنگریت پشومانی



نون ادا بیتواری ساہیل انت  
 مردمی گنگدامین چیہالان  
 روچ و شپ تُرس و بیم روڈینیت  
 شہرے ڈیوال جنگجاہ انت گوشے  
 روچے یک دردی کسھے کارنت  
 دیدگان دید سگ پدرد کننت  
 من وتی ہستیا پشومان آن  
 دریگتین من شپانکے بوتینان  
 در و دیوال کہ بدیستیننت  
 ایوکا نابزانتی ڈوبارتین  
 ایوکا واہگے بچارنتین  
 دمک و در تئو ندیستگ انت دیر انت

دلا گوشان کہ نمدیے ترا نیسان راہ دئیان کہ شہر مردگانا بیوسی نبشته انت  
 پسیل و بان ستر ہبر کننت

دُرْهين تَهَار و چيروکاييا

چو کور و کرين دلوتا چدا گوزنت

دلا گوشنت

اے آدت أنت

هما که سگ و واکئے شارا بستگ أنت

وتی تھا سُچنت، بُرجنت و بيوس أنت

## کئے ائے؟

منی دَرَامَدِیْن کتاب باز بنت

ونتگین، نونتگین، دُرْهین گُمانا بار بنت

هَمْک بَرَا کَبَاٹ من کہ پِچ کُنتت، دَرَامَدِیْن سَرُک اتنت

تئی نہ این

منی نہ أنت

بارین چینچک وهد گُوستگ و نتگ أنت بلہ چہ کِسْهان و گیش ہما و دار و نتگ أنت

ہما پکار و نتگ أنت، دُرْهین منی کَبَاٹا اِیر اتنت، دَرَامَدَا

و باز جاہش گِپتگ أنت منی ہئیالئے کُوثیا، منی کَرارئے دَامُنَا

من انگتہ نرانتگ أنت اے چے کُوشنت

نِپْہِمْتگ کہ کئے و کئی تھل و شَکَلِیْن گُمانا پُلّ و کُنْشگانی کِسْہ أنت

بلہ هَمْک بَرَا کہ و نتگ أنت تہ گُوشتگ أنت منی نہ ایت، و سِستگ أنت من اچ و تا

منی تها کتاب ایوکا درامدین وتی نه انت، دگه هزار نیمتتوامین دروشم انت

نه بالو انت، نه جنگل انت

نه بن گرت، نئیکه بال بنت، رثونت

بانزل انت که مورے جانا سستگ انت، لگت بنت

تان وهدیا چنگ ببنت

لگشتگ انت و پاؤ انت منی درامدانی درسین واب گروھگ انت مرتگین و کپتگ انت،

چنگ نبنت

منی همے درامد انت برے برے وتا گوشنت، شئیر بنت و سئوت بنت

منا چه باز مھکمین و یاگین هبر کننت

لگور ایوکا منی کشا، منی هیالئے پیرین مؤسم انت، نه بور بنت، نه بر کننت

همے منی رگام و شنزگانی دژمن انت مدام تاکچندئے اکسے دردا پانگ انت

یا گون منا سپر کنان، گسر کپنت

من دم بران، وتا گوشان منی تها که هر کسے منی نه انت، منی نه انت

در آیگانی راه نبستگ انت، در ئیت، برئوت، ته بلکنه وتا دچار بان

بله کجا اے مانشانی ساھگان جتا کنان

تہارَ بنت و شپِ کنت بلہ سِدگ شَمُشتگ اَنت

کُجام؟

کتابے اَن کہ وابے اَن؟ پُلے یا کہ موری بانزُلے؟

من یاگی اَن کہ زندگین لگورے اَن

ہما کہ دور نِشتگین نِدارگا دو ساہگ اَنت کہ لہم لہما پلپینت برے برے

گنکین اَکسیئے تھا

یکے اَنگہ سئوت جنت و شعیر بیت

بہشتین وابے سرشپے کہ تان سبہا اگہ اَنت

گمان کنت و تلوسیت

«کُجامیا کُوشے؟»

ہمے کئی کَماتگین و دارکلکشانے شیشگ اَنت، کہ رد دینت؟

مَسکرا کنت

گون دَسٹیئے شہارگا گُبار بنت

كجا منى كسانكين اے شارٽے لمب

سُهئيل و ماهِكانيا گُمانَ كنت؟

اے دُرس په منا درامد اُنت

من ايوك اُن

من بس وت اُن

## شعیر

اَکسا بیگاہئے کُلی بالَ کنت بیوانکا  
زیکین ساچانا دگہ نیمگے کُورتگ بلکین  
نَمیین گوات منی چاڑ و تبا تاپینیت  
تتو کہ بیگاہ کُتہ رَنگانی دُرہین براہئے سپر  
نون منا وَّش نَبیت ایوکا سَنجئے چارگ  
کد نون هامین ببیت گیمرتگین مچانی ودار  
چش تئی دُکئے دِپا پادَ نکیزیت، نشتگ  
دُرؤہیت رُؤزرد منی زندئے دُرہین رُوتاپا  
چینچک گرماگین بدن آس بلیت اؤمانین  
سارتکین گوات ہیالان چتتو گوازی داریت؟  
شیرکین اتر شلنت ساهئے دُرہین چٹولئے پُرشگ  
زندگی اَکسا نکشیت منی بچکندئے  
تتو کہ بامگواہ منی دیستین تہ بیگاہ مارت

## گورتھار

دۆشیگین واپ

آسے که آندرا چه منا نمب کنت کوزیت

وت آگھی

اؤبالان زوریت آسرئے

تاھیر بیت گم آشنا

دل بیسرین اومان کنت

هر چیز جندئے ساھگ انت بیوانکیا آندیم بیت

مھرانی مؤسم پیتکگین یک کاگدے

تاکچندئے زردین تاکیا

نر آرتگات بارین کجا

شپ سرجمین شوھازگا گوازینتگات

دم برتگین مھکانے ات همبل منی

شپ آشناین آگھی چمان منی بکان کنت



وابان منى چُكَّانَ كنت، بيدِ منا كَسَى دگه كِرَّا نرثوت

هر دو شزار این اُچ و تا

همزان اتین ما و و دار

من زندگی گوازینتگات یکین شپا

چندے کشا

## *A Touch, A Click*

(دَم بَرگئے ناما نزمے)

او مِهردَر!

او دَلبَدَر!

تَو نَبِيئِے شَكُورَتِگِين تَرِگُكَانِي بُوَسگِے وَرَا سُوچِے

نہ مِهَرِے ائِے، نہ كُچَلِے

چہ اَنَدَرَا تَو پَرُشَتِگِين دَمَانِي تُكُرُے وَرَا نہ زَرَتِ بئِے نہ دُرُوهُگِے مِيَارِے بُوچَكُهَا تَرُهَے

تَو زَانِے لَهَتِين رُوچِ گُرَانِ بِيَتِ

بله گُوَزَنَتِ

گُوَزَانِ گُوَزَانَا پَشِ كِپَنَتِ

و اِيَرِ بِنَتِ

چُو وَشِينِ وَهَدِے تَرَانِگَا كِه سِيسَتِگِين سُوَاسِيئِے پُوچِگِ، دَمَانِے مِهَتَلَانِ كِه پَرِ رِچِيَتِ

گُمانِ لَنَكُكَانِ وَتِي تَبَا بَرَانِ كِنَتِ تَانِ سِيچِنَا بَسْمِيبِيَتِ تَرِكَبِيئِے پُوچَلِ

چُو سُنَكِگِين سَرِيگِيئِے كِه پِچِ وَ تُنْگِ هُنَرِ كِنَتِ وَ چِيَرِ بِنَتِ

آنچو و اب و آکھی

منی دمان پُرشَتگانت

کئی انت که دم برانا گام جنت منی تھا

در آ، برئو

او دلبدرا!

او بیژبانین واهگئی تپرا!

مروچی مهلبا گون لَنکُکان بگُڈ

هتر بدئی

او دم برگ!

او زندگیئے بو!

تتو بیا بِنند من کسھے کنان

که هستات یک میتگے دلا

و هستات یک بالوے

و بالوا چراگے هستات میتگا

بله چراگ مُرتگات

و میٲتگا مُدامی شپ ہزار چمّے کورین پوشا تل مان تل

و سر پہ سر گوزان اتنت

و بالو، بے چراگا زندگ ات

و کورین دیدگان چہ یکے ات

بلہ تان کد؟

نزانے زانا بالوانی بانزلان انت زندگی؟

تعو بل کسہا چراگ و بالوئے

من ساہگانی کسہے کنان

ہست بیت ساہگے

شگان چپتگین دو چمی کونسے چیرا زکُربت

برے برے کُربت

اے بببَدَن

بَدَن بَدَر کجا برئوت؟

نندیت، نندیت

شش ہتم ہلاس کنت

و تاكچنڊان شش دگه چو نڪڙي تڪان اير بارت

هٽم زدگ

هٽم بدر

كجا شتئي؟

بنند ادا

اے كسھاني دردا گندگا اے نان؟

هٽمك دمان لنتئي هونان زرد كنت

كديت زند اندرا

نون لھم لھما اڀ ڪنت اے زندگي گوشئي اے ٽپ وش بنت هٽم وڙا

او چم بدر!

تئي چهرگا دگه جننت

تعو مردگاني وابئي واهگئي وڙا شپان گزيئي ڪنڊيا

تعو ليزي اے ڪرتڪگين

شمشتگين

و كاڻ و کوٽا پد

No space

**Formatted**

## گوشے اے اشک زبکینِ انت

گوشے اے اشک زبکینِ انت

ہمینچک نوک و پُربالِ انت

ہمینچک دردآزاتِ انت

گوشے من زی ترا دیستگ و مرچی بال روڈینتگ

گوشے من دَرین شنگینتگ و گواتے لَنکُکان گونِ انت

من رَنگین آن تئی رَنگا

گوشے بچکندے آدینکِ انت منا چاربت من بچکندان

گوشے دنیا تئی آکسے منی چمے تھا دُرَتکگ

من هرچنت اچ ترا گستا و تا چاران ترا گندان

گوشے من پُکئی آن برے رچان آن آنچو بیبار آن

گوشے دل چاتے آپ کپتگ همے زوتان

منی هوشامی نمیبنتگ

گوشے من ترمپ ترمپا آپ بوان آن

جُرَّانِي پُتَّهَانَ گُونِ آن

گُوشَّئِ وَشَبُؤِ نُونِ بَجَكَنْدَنْتِ

وَ زَبِيلِ سَاهِ كَشَّئْتِ

زَنْدَگِي سَازِئِ

گُوشَّئِ هِرَكْسِ تَتِي آوَا زَا كَبَّيَا اِنْتِ

گُوشَّئِ مِنْ نُوَكِ اِشْتَاپِ آن

شِپَانِ پَانَكِ بَيْيَكِ لُوْثَانَ

مِنَا لَبْرَانِي دُكَّالِ اِنْتِ

هَمِينِچَكِ گُونِ تَرَا كَبَّيَا هَسْتِ

نَرَانَانَ چِئِ گُوشَكِ لُوْثَانَ

گُوشَّئِ مِنْ نُوَكِ بِييَاژِ آن

نَلُوْثَانَ هِچَكْسِي نِيَادَانَ

مِنْ بَسِ گُونِ تَتُوِ بَيْيَكِ لُوْثَانَ

گُوشَّئِ مِنْ هُوْرَكِ آن اَنْچُوْ كِه دَنْيَا ئِ تَهَا دَارَانَ

گُوشَّئِ مِنْ سِرْجَمِ آن اَنْچُوْ كِه جَنْدَا هَمْ نَوَاهَانَ



تتو آنچو نۆك و ددان ائى

كوشئى من زى ترا ديستگ و مرچى زند برهدار انت

كوشئى هچى زمين و آزمانا پش نكپتگ

تتو تهنائى ، من تهنائى

آ و شى زى پدا اتكگ

من زندا دوست داران آن

من جندا دوست داران آن

## هُدائے میتگ

دور

سکّ دور چھرگین

دئورانی وایان

سکّ بنت

آهدئے ودارانی چمّ

بارین کدی دؤرانی باری مٹّ بنت

اے زندگی

اے یکّ و تهناین سپر

هر دو سئواسان سستگین

گک بستگین پادینکینا

گران انت جاھے رۆچینا

جاھے شپا بڈا کتگ

جاھے سُدا واپینتگ و شرِ پتگ

تان اندگہ سُهبے سرا

چَمانی سیاھی آرگی سورمگ کُتگ

لُثنانی تل بچکندگان گون ترکتگ

هُونانی پئے شپتگی

کئیدانی جاہ مُرواردِ آنت زُلپان سرا پر شانتگ آنت

رَنگے آنارکان مِتنگ

آنچو دئے زَنگے وُڑا

پاسگ نبت

سَهتانی دُرُوشم مٹ بنت بارین کدی؟

بارین کدی اے دوریان سر بیت آهدئے زندگی

وازمندگین ماہئے سرا

لُڑے دئے بیہاجتین

تہناین بزنے بیوسین

هر شپ یک چمے نر کنت

گُون لَنكُكا اِسْتال و ماها دَسْت جنت  
 هر شَب هَمے رَنگا هَزاران واہگ اَنت  
 لِيئِنْت و چَمَّان مُچ كِنْت  
 بارِيَن كَدِي واہانِي هَسْتِي مَتَّ بِنْت؟  
 واہگ مَبِنْت  
 دَزَرَس بِنْت  
 ہالے بِياتَكِيَن رُوچِيَا  
 گِواتا پَتاتِگ زِنْدِگِي يَكْجَاه كُتْگ  
 اَنچُو زِمِينچِنْدُا گِوشْئے  
 كَبْرانِي مِهْرَم اَرْتِگ و نامِهْرَمَان لِيْنَس داتْگ اَنْت  
 اَنچُو هَتْوار اِنْت زِنْدِگِي جَاهے دِگَر  
 بارِيَن كَدِي دَوْران چَه دَوْرِيَن دَوْر بِنْت

# دُرُھینِ کِسَّہِ ترا گونِ اَنَت

(شہیدِ واجہِ ابراہیمئے ناما)

ودارئے

درد و تئئے

شُد و دمتوسیئے

وتی زندئے مُرادئے

أمیئئے دَمِ برگ

گونِ ملکموتا جنگ و چوئئے

وتی مہرانی جیڑگ

وتی ارواہان مودگ

برے یک وایبا گونِ ایوکیا کِسَّہئے آرگ

گوشئے اے زندگانی بس ہما روچ و شپانی آسئے لمب ات

نہ پیشا زند بوتگ

نہ دیما زند پیداک ات

مان کۆه و گار و دگان درد پیڑاھگ

وتا زھیرۆنکے مارگ

وتی جندئے ودارئے کِسھانی گوش دارگ

وتی جندئے گُمانا

ھمک چیھالئے ترکانی سرا ھیسکارگ و چمانی شودگ

پدا پادا آیک و راھان تئی شوھازئے بُرگ

کجا گار ائے؟

گوشئے تئو کِسھے پش کپتگئے ایر ائے

تئو سکا دور ائے

گوشئے ما انگتھ جیڑین تئو کائے

بگندئے تئو وتی کِسھ، وتی تئیگین دیدگ

وتی شپ کپتگین ارمان و واھگ

ھمؤدا کۆھییئے لمبا پتات و چیر داتنت

بله آپسۆز و ارمانان سپر بُرت و سر بوتنت

تئو پرچا ایوکا نِشتئے؟

پدا پَرچا نئیاتکئے؟

دُرھین کِسّہ ترا گون أنت

کدی کائے؟

وتی هالا کدی کارئے؟

ادا لَبزانی مانا دُرس دُرؤگ أنت

تئی واتر نبوگ

تئی آ گُدّی مجلس

تئی مِهرانی ساہگ

تئی اُمّیتئے تُرانگ

تئی هِچبر نئیایگ

و تئی بیوانکی و بیگواهی راست أنت

## آلی جان

(نَدْرِ پِه تئیی بیتماهیین آرواها)

بیتماهی، بیوتی و بیوسی

دوری آنت نیاما نگاهئے رُستگ آنت

نزیک گُورا گندگ نبئے

او گُوندُک

گُوگایی لئیب و گُوزیانی مؤسَمِ اِنْت

زندئے مُرادانی سَپِر بیباورِ اِنْت

دُرچکئے برا چو سِستگئے، دور کِپتگئے

دورین سَپِر تئو رِبتگئے

واترِ نبئے



زانئے گمانی سیه شپ انت، باندات بنت

تتو نیاہگئے اهدا شتے و زندگی آنگہ تتی برمش و چڑکاهان زريت

بے تتو ابیتک انت روچئے گم

بارین بچاریت آنگر انت؟

بارین بچاریت کہ کج انت؟

سد بارین چہ ما سستگ انت

و واہگانی چیلکان روچے سدن

کھت انت و بزن انت بیکساس

و تتی ودار

انچین گم انت کوہا کپنت

سینگ تل انت

پہ تتو پدرد انت کر و گور گیمرتگ انت

چارگ نبنت

درد انت دلا کہ دور بنت

کھت انت ترهگ بیہال بنت

بَرن آن کہ گُونڈین واہگے ہم تئو نکت

بَرن آن کہ دردئے کِسھے پش کیتگئے

وہدے شُتئے

بچکندگانی مؤسُمے گُون وت پتات و برت گُون

بچکندگانی مؤسُمے گُون وت پتات و برت گُون



## دلئے دروازگ

تتو سبر کن

بنند ادا

دلئے در انت

تان پچ ببیت

اے وهد جنت

اے وهد جنت

## وتا چه در من ترا شہازان

او مہرے بانزل، چیا چو بریجنت تئی پلین امباز

کجا ژیلینکنت مروچان پادینک مہگلانی

تتو چون آبتیک ائے، تتو چون گمیگ ائے، ترا من گندان

اے آس و پیشا کجا شتنت شانتلانی زیمیل

او ایمنی شانتلئے کدوہئے کدی بئے واتر

کلاتین جمر کجا مروچان تئی نوڈ شنزنت

من توشگان زوران در کپان پہ ہما نون ہلکان

من ریگزاران جنان آن سسر ترا نگندان

اے شہرئے دمکانی تاکچنڈان نگندان آسر

کجام گلاب انت کہ تاکچنڈا سربیت و بو کنت

کجام دمکان مروچان رُزناہی زندگی کنت

من دَس لوثان، نشان لوثان

چه کورچاتان

من آسے دریائے لمبا نشتان کہ تُوں پُروشان  
من چوں گَنوک آن کہ کاگدے لوگ و هئور لوٹان  
من زر تئی آزمائین رَنگا تَهَارَ گِندان  
من گار و بیگُواه هدایا چه ناھدای لوٹان  
او ایمنی! من تچان تئی پُشتا گئیاب و کُوهان  
من نابزانت آن  
وتا چه در من ترا شُھازان

## زندام

او زندگی

گوشے تئو یک کتابیے ائولسرا نیشنگ ائے

و من دُربین کتاب بس تئی شہازگا تان گڈی لبزا ونتگ و نون جیڑگا آن تئو کجا کجا اتئے

ادا من آن کہ من وتی دلئے دُریگ

و دُریکگانی نام بستگ زندگی

من واہگانی مردگین ندارگانی وانگیارا چے گوشان؟

یا وشبانی مؤسمے آ گڈی تاکئے گیمرگ

کہ چم وت من دیستگات و پہ بیوسی چرا دمانا گُوستگان

و دزرسی ہئیالیئے ہدائے دستا دات

تُربان

تُربان

تُربان بوتگان

نون دلیمکیم نشتگان

اے ساہے چاپا پہ وتا

کجام کجام ازابئے بُت نتراشتگ و کجا کجا نچنگ

ترا گوشان، کجام ائے تئو؟

گمانا یک ٹہپنتگین جہانیئے ہدائے رنگ

یا اے دمانا درد و تیرکانی ہستیئے دُربین سئوب؟

ترا، او زندگی، کہ من  
دماںکیا پیش گندے ہپت رنگا، تاکیئے سرا نبشتگات  
و چم سک داتگانٹ تان دیران  
دیران  
سکّ دیر  
تئو شنگنئے  
تئو انچش ائے  
ترا گُوشان  
کجام کتابئے تاکیا نبشتگین تئی نام و رنگ ہبر کننت؟

## وتی بیگوواھیانی گواہئے پٹگا گار آن

ترا گُوشان

اے گاریانی رنگا چے کُوشیت جھان؟

و گُنگیان کجام زبانا گپّ کنت

کمال کنت

من آن کہ گون منا دمانُکیئے رنگ اژنت و گردِ گردا ترگا اُنت

کِرّ و گُور

نان آزمائے چہرگا جننت

نان کُل جھانئے دروِشم اُنت

چو ہالتاکئے لبز و اکس کہ جنترا دُرُشگ ببنت ہمے وڑا من رِزہ رِزہ آن

و پورُکیا گون آن ہلک و میتگان

و چوریانی لٹّ و شیولگ

چُرُبننت تُکران منی

برے من مُٹکانی کالکیا اژان بان



برے کسانکین دو والیئے شَما تَرہان

برے برے وہ لُنٹکیئے کِشکُکان من زُکُران

برے من لِچان دنتُلان

و کونسان جِگَّ بان برے برے

کجا کجا سپر کنانا سر بیان

پدا وتی شہازگا؟

کجام کئورئے لمبئے بوچُکان گون لُنکان بچونڈان

و کجام ماہیگیرئے داما یکَّ یکَّ کنان؟

بچیلَّ بچیلَّا اے جہان و آزمانا آرت و ہاکئے رزہان منی

کئے انت کہ روپیت ہورَ کنت و لیسَ دنت و اَدَّ بکنت

پدا منا

منی وڑا

## گڈی جوں

زند دُکالے منی باتنا کپتگ مرچان

مُردگا چوں بکنان

گڈی سهدارا کئیی جوں بزان چوئڈتگ مُرتگ

لهتین پگر اُنت کہ سرے مازگان کبرے لوئنت

لهتین اکس اُنت منی چمانی تھا کپتگ اُنت جوں اُنت

اندرا میتگے هست اُت گندے؟

گوات نون گام نجنٹ چمگے دلبندے سرا

ماہ و مہتان گوشے بس ہئیالی شہکار اُنت

کئور و دربا نون گمانا کنڈ اُنت

زید چیسے نون منی تُرانگان بیہال کتگ

مؤسمان تاک دُرہین چنڈتگ اُنت، اُندرس اُنت شاہانی سرا

شپ سئواسانی تھا سستگ اُنت راہے نیما

رؤچ مان کمبلیا پیتکگ کشا دمتؤس اُنت

سَاهڪندن دلئو دروازگا نشتگ ذرڪئت  
پُرس داشتگ من و ارواها مرؤچان مهرئو  
آه، به دُسو و نشانين مرگا  
كوپگان جنديئو مئيت مني بذا كپتگ  
كئو منا كبر بكنن و بداريت مني پرسا  
جنن دُكالو مني باتنا كپتگ مرچان

## دُرہین سہدار مرگئے تاما چشنت، دردارا کئے سرپد بکنت

(ابائے ناما)

او منی زندگیئے شرنگی

او منی ساہئے زیملئے واہند

او منی ٹھک و کندگئے بُنزہ

تئی تتوارئے و گوانکئے ندران من

تتو ہما انت گون من بیتران ائے، زندگی بیتتوار انت، وئیران انت

من تئی مجلسانی کُربان آن

اُمریئے نکش شُشتگ انت و ہدا

تتو اگان پر بترئے چے گندئے؟

گونڈوی پیر و آجزین کبرے

میتگی جؤنے کتورئے لمبا

چؤ وہ دم بس ترا گون بندوک انت

ہئو، بلہ من برے برے جیڑان

او منی باتنئے ارواہ  
مارا میتگے ہست آت  
گونڈین کاپرے ہست آت  
باگے آت تئی ناما  
مرچان اوڈا ہچی نیست  
نیستیانی گرانین بار  
کوپگان کنگ بڈا  
در پہ در من پر تران

درد بیت من وهدے تئی درد و دوزان جیژان ساه

تئو منی آزمائے رنگا ائے  
تئو منی کُل جہانئے پیما ائے  
تئو ہما ساہتانی ہمراہ ائے

زندگی پرؤشگا منی کئیت انت

(مُهکمین کؤهئے ڈئولا تتو

من تتی دامنئے کیلگ)

تتو منی تئئے سارتکین کؤلگ

اے سپر زندگی انت تتو همراہ ائے

او منی زردئے توشگ و چمگ

گوشتن و تتی گپ و گال

زندگ انت اے دلبندا

من بلہ تلوسان تتی دیدارا

من بلہ تلوسان پہ تتی نیادان

## "مہلب ہلا سین کسھے"

ٹرمپ ٹرمپا دردِ میسینیت منا

مہر چو جولاہگا پیچان کنت

نکشان دلے

گم کئے و کئی چمان رنت اچ میتگئے دمک و دران

بازار و باگ و کھچران

دل رستگ انت کونسانی نرین رولہان

زی بیگھا روزردئے رنگان گرتگ انت بیوانکیا

دیوانگ انت ...

اینچک نزاننت ترانگی دنزان شلنت

و شیشگی دیوالے آ دستے ندارگ کہ سُرپیت

نُگرہین او مانے سگ سک رد کپیت

لُٹانی نمبیں بوسگان سورگ کنت

مہلب ہلا سین کسہے

پیرماتی شپ گوازینگی نیمونے لبزان رتکگین

ایرہتتے رنگین ساہتے

ایر بُرتگین دردے وڑا بیوار کنت.





